



KOMUNIKADO PA PRENSA

Òktober 2013 hopi seku na Kòrsou

Òktober 2013 lo drenta bukinan komo un di e òktobernan mas seku for di 1935, tempu ku a kuminsá midí áwaseru na Airopuerto Hato. Loke ku nos ta kustumá kuné den òktober ta un luna ku un kantidat di aktividat basta grandi di áwaseru, kompañá pa welek ku bos. E disturbionan ku normalmente ta pasa e tempu aki di aña banda di Islanan ABC, tabata ménos aktivo e aña aki. Durante di luna pasá a midí solamente 18.7 mm di áwaseru na Hato. Pa kompará: e promedio di áwaseru p'e stashon aki ta 102.0 mm (na òktober). E montante mas haltu pa òktober a ser registrá na 1988 i tabata no ménos ku 373.1 mm. E òktober mas seku tabata esun di 1958 i e tempu ei a midí solamente 5.4 mm.

Áwaseru ku kai despues di 8'or di mainta, ta konta p'e próksimo dia. Den kaso di e awa ku a kai riba 31 di òktober, loke a kai despues di 8'or ta konta pa 1 di novèmber. Dor di esaki, novèmber a kuminsá bastante muhá.

Durante di e luna ku a pasa, e kantidat di dia ku áwaseru (1.0 mm òf mas) tambe tabata limitá na solamente sinku. Pa promedio, òktober tin 8.1 dia ku áwaseru na Hato. Aktividat di welek ku bos tambe tabata ménos ku kustumber i ta riba solamente sinku dia, bos a zona. Pa promedio, òktober tin 8.7 dia riba kua ta tende bos.

Na otro partinan di Kòrsou tambe kantidatnan di áwaseru tabata limitá i na algun lugá a kai asta ménos ku 10 mm.

Dor ku a kai tiki awa, òktober tabata un luna bastante kalor tambe. E temperatura promedio (over di 24 ora) durante di òktober 2013 tabata 29.1 °C. Esaki ta mei grado riba e promedio di hopi aña di 28.6°C.

Perspektivanan pa loke ta trata e kantidat di áwaseru ku ta ferwagt durante di novèmber, desèmber i yanüari, ta indiká ku lo kai un kantidat di áwaseru ku lo ta mas o ménos e promedio di hopi aña.
